



## CHU RÎ CHU I HRIA EM?

CHÂNGVAWN: “Mi zawng zawng chungah ka thlarau ka leih ang,” (*Tirhkohte 2:17, NIV*).

Chhiar Tûr: *Tirhkohte 2; Tirhkohte Thiltih*, pp. 35-46.

A Thu Zirtîr: A rawngbawl tura thiamna Pathianin min pe.

*I thil awh ngawih ngawih nei turin hun eng emaw chen i nghah a ngai tawh ngai em? I nu leh pate hnenah i han diula, mahse an ni lah chuan a la theih rih loh an lo ti bawk si. Isuan a Zirtîrte hnenah Thlarau Thianghlim pek a tiam a, mahse an nghah rih deuh a ngai. Thlarau Thianghlim a lo thlen meuh chuan, an rinang a ni lo kher mai.*

JERUSALEM khawpuiah chuan mipui an rawn pungkawm tup tup a. Kawtthler paw theng thungte chu khawvel hmun hrang hrang aṅanga mikhual bengchheng ve tak takte hlin a khat a. Mipui ho chu an ṅe chel chul a, an in nek nulh nulh a. Sabengtungte chu an lo be ve bawk a. Nausen ṅap thawm lah bang lo. Pentikos kut hmang turin Juda mi tamtak khawpui thianghlim Jerusalemah chuan an lo kal khawm ruih ruih a.

Zirtîrte leh ringtu mi tamtak chu awmkhawmin, pathian an bia a, an ṅawngtai bawk a. Mahse an zinga mi tumahin thil phurawm deuh lo thleng mai tur chu an beisei lo. Chutiang thil chu a la thleng ngai reng reng si lova.

Thawklekhatah ri mak tak hi van aṅangin a lo chhuk a. Thli khauh tak, na taka a lo thaw hum hum ang mai hi a ni a. Mahse thli chu a ni miah si lo. Thlipui natak ri ang mai hi a ni a. Mahse thlipui natak pawh a ni chuang hek lova. Churi chu pindan chhungah chuan rawn lutin, pindan chhung chu a luahkhat ta vek a. A thawm a rin em avang chuan pawnlama mite chuan eng nge thleng ta tiin an hawi kual vel ruai a.

Tichuan thawm ri chu a reh ta a. Ringtute chu an in enkual vel a. Lei ang tak mei an hmu a. Chu chu pindan chhungah chuan a ṅai darhin, mei chuan mi zawng zawng chu a dek ta vek a. Chu chu Thlarau Thianghlim a ni! Thawkleh khatah ringtute chu Thlarau Thianghlimin an lo khat ta vek a! An rilru chu ngaihtuahna tharin a rawn inthlak a, an rilru pangngai kha an pu ta lo – thu thlunglua



zawlneite ang mai kha an lo ni ta! An chungah thil thleng chu awih harsa an ti lek lek zawk a! Ring takin Pathian an fak ta a.

Pawnah chuan mipui an lo pung tam tual tual a. Inchhungah eng thil nge thleng tih hriat tupin an in nel tawlh tawlh a. “A chhungah sawn eng nge maw thleng le? Tiin an in zawt hlawm a. “Ka hriat ang chu in hre ve em?” tih te an in zawt bawk a.

Tichuan mipuite chuan thil danglam tak an hre ta. Inchunga mite chu a ruala tawnga, au rual dual dual hian an hria a. Eng nge ni ta le?

Suria rama mi pakhat chuan, “Ngawi lawk teh u! Chu ngaithla mah teh u!” tiin a bah chuan mipuite chu a han zap a. “Saw inchhungah sawn kan tawnga thu sawi an awm,” a ti ta a.

Aigupta ram atanga mikhual pakhat chuan, “Chu kei pawh! Inchhunga mi pakhat kan tawnga thu sawi a awm!” a ti ve leh a.

Pakhat chuan ring fa hian, “Awih awm loh loh! Saw ina awmte sawn zu an rui a nih saw a!” a ti a.

Mi thenkhat chuan, “Zu an rui! Zu an rui! Zur an ui!” tiin an lo au chuah chuah a.

Mi dang pakhat leh chuan, “hei an lo chhuak e!” a ti a.

Petera leh apostol dangte chu inchhung atang chuan an lo chhuak a. Mi zawng zawngin an hriat theih tur khawpa ring chuan Petera chuan thu a han sawi ta a. “Ka Judapui duh tak leh Jurusalema awm zawng zawngte u,” tiin bul a han tan a. “Ka thusawi hi ngaithla u ula, eng thil nge thleng tih ka han hril hang



che u. I rin angin heng mite hian zu an rui lo ve.” A han ti leh phawt a.

Tichuan Petera chuan mipui pungkawmte chu Isua chanchin a hrilh ta a. An sual ai Isua chu a rawn thi a ni tih te a hrilh a. Isua chu thihna ata a tho leh a, tunah vanah a awm tih te a hrilh bawk a. Pathianin an sualte a ngaihdam tur thute pawh hrilhin. Anni pawhin Pathian thilpek Thlarau Thianghlim an dawng ve thei a ni tihte a hrilh bawk a.

Mipuite chuan ngawi thuapin an lo ngaithla a. Mi tam takin an thu ngaihthlak chu an ring a. Chu mi ni chuan mi 3,000 velin Pathian kohhran chu an zawm ta a nih chu!

Nang pawh Thlarau Thianghlimin i nun a tikhat ve ang. Isua chanchin midangte hnenah hrilh turin a pui che ang a. Chu chanchin tha chu tu hnenah nge i sawi ve ang le?

## TIHTURTE

### **Sabbath**

- Thlarau Thianghlim chu thli nen a tehkhin a ni thin a. A remchan chuan, thli thawtna hmunah kalin thil che vel kha en ula. Chutia in kallai tak chuan, in chhungte nen Biblea Thlarau Thianghlim awmna thawnthu kha sawi ho teh u.
- Lawmthu sawina hla sa ula, chuan in chhungkuaah Thlarau Thianghlim awm tur Pathianin a rawn tirh avangin lawmthu sawi rawh u.

### **Sunday**

- Chhung inkhawm laiin, *Tirhkohte 2:1-13* hi chhiarin sawi ho teh u. Thlarau Thianghlim chanchin enge in hriattheih? Bible map en ula, chang *9-11* a hmun an sawi te hi zawng teh u.
- Mei pianhmang 10 chepthla ula, in changvawn kha thumalte tein ziak rawh u. Chawhpawlh vak ula, a nihdan tur angin rem thlap ang che u. Chutiang chuan vawi tamtak ti rawh u. Hemi hmang hian in chhungte in ziritr ve dawn nia.
- Thli thawt deuh nî a nih chuan, thian lehkhachaih nei hruai ula, Thlarau Thianghlim nen a inan thu in hrilh dawn nia.
- Thlarau Thianghlim in bulah a awm thindan ah lawmthu sawi ang che u.

### **Thawhtannî**

- *Tirhkohte 2:14-22* hi vawiin chhung inkhawm chu chhiarin sawi ho ula, Chuan *Joela 2:28-32* hi chhiar baw rawh u. He changte hi engnge an inan na? Petera hian engvanga tiang thute hmang nge a nih in rin?
- Theitui burkhat in chhungte tan siam teh. In bun chhuah lai chuan, Pathianin Thlarau Thianghlim a Zirtirte hnenah a leih chhuak lai chanchin in hrilh dawn nia.
- Paper them kha fan angin thlep ula, chei rawh u. In in zah pah a, thli lo kal khan Thlarau Thianghlim engtin nge a hriatchhuah tir che u?
- Thlarau Thianghlim lam hla sa ula, chuan malsawmna tamtak vurtu Pathain hnenah lawmthu sawi rawh u.

### **Thawhlehnî**

- Vawiin chhung inkhawm atan chuan *Tirhkohte 2:23-41* hi chhiarin sawi ho teh u. Mi engzat nge baptisma chang? Engzat nge biak inah kal? Chumi aia tam deih chu Petera'n engzat nge a baptist? Baptisma changzat atang khan biak inah inkhawmzat han sem teh u. Thlarau Thianghlim a thlen hnu khan Petera leh zirtirte khan in biakin ang hi engzat nge an din theih a in rin ?
- Thlarau Thianghlim sawifiah dan chili ngaihtuah ula, chu chu in chhungte hrilh ve rawh u.
- Thlarau thianghkin chu tanpuitu tih a hriat a ni baw a. Vawiin hian mi tu emaw kawngthum tal a puihdan ngaihtuah ula, Pathian puihna dil ang che u.

### **Nilainî**

- *Johana 16:13* hi In chhûngte nen chhiar ho teh u. Zawh tur: Engtin nge Thlarau Thianghlimin min hruai ang? Thlarau Thianghlimin an puihdan in zawt theuh dawn nia.
- Chhung inkhawm laiin, mawmbati chhi ula, a eng kha en teh u. Pentecost ni ah zirtirte mei engin a pan lai lem ziak teh. In chhungte zawhtur: Engati nge tun hunah Thlarau Thianghlim hi mipui zingah mei angin a lo kal tawh loh?
- In pastor kha ngaihtuah ula, Thlarau Thianghlima a khah theih nan tawngtai sak rawh u.

### **Ninganî**

- Vawiin chu, *Tirhkohte 2:37-39* hi chhiarho teh u. Peteran 'mipuite an kal hla'tih a sawi khan enge a sawi awmzia?
- In inah hmanrua engzat in nge thli siam chhuak thei? (Entiman: sam chhem ro na.)
- In awmna khuaah khan mi chi hrang engzat nge awm sawi teh u. 'Pathianin a hmangaih che' tih hi tawng chihrang hrangin sawi thiam tum rawh u. Puitlingte inpuih tir ula.
- Hmangaihna tawp lova min hmangaihtu Pathian hnenah lawmthu sawi ang che u.

### **Zirtâwpnî**


- Chhung inkhawm laiin, *Tirhkohte 2-na* hi chhiarin sawi ho teh u. Thlarau Thianghlim chanchin engnge in hriattheih? In chhungkuaah engnge awmzia a neih?
- In changvawn kha sawi ho ula, chuan 'ka engte takte hi'tih hla sa ula, chuan in chhungah chawlhniah in serh naah in bulah awm ve turin sawm rawh u.

# PUZZLE

## CHU RÎ CHU I HRIA EM?

**KÀWHHMÙHNA:** Heta nambâr leh hawrawp ìntlùk tawn dân hi chîk taka én la [Entîrnân, 1 leh H a ìntlùk tih i hria ang,] nambâr dangin enge an tlùk tih pawh hriat a har lo hlê ang. Tichuan a hnuaia âwlah hian nambâr mìlpui harawp chu ziaak zêl ang che. Zirtîrte awm khâwmna pindan rawn tikhat véktu, thâwm ring tak kha i hré thei mai ang.

H I L O P R S T Y  
1 2 3 4 5 6 7 8 9



1 4 3 9      7 5 2 6 2 8